

每週經課朗誦經文(巴克禮漢羅/教羅)2013/04/07

共同經課 - 1 使徒行傳五章二十七節~三十二節

27 Chhoā 來了，就 hō in khiā tī 公會 ê 面前。祭司頭問 in，講，28 阮 bat 嚴嚴禁 lín 莫得用 chit-ê 名教示人，lín 就將 lín ê 教示遍傳 tī 耶路撒冷，beh 用 chit 人 ê 血歸 tī 阮。29 彼得 kap 其餘 ê 使徒應，講，順 thàn 上帝 khah 過頭 tī 順 thàn 人，是合宜。30 Lín 所吊 tī 柴裡，來害死 ê 耶穌，咱列祖 ê 上帝已經 hō伊 koh 活。31 Chit-ê 耶穌，上帝用家已 ê chiáⁿ 手舉起伊做人君，做救主，beh 將反悔 kap 赦罪賞賜以色列百姓。32 Koh 阮爲 tiòh chiah-ê 事做干證；上帝所賞賜 hō順 thàn 伊 ê 人 ê 聖神也做干證。

共同經課 - 2 詩篇一百五十篇

1 Lín tiòh o-ló 耶和華。Tiòh tī 上帝 ê 聖所 o-ló 伊；Tiòh tī 伊權能 ê 穹蒼 o-ló 伊。2 Tiòh 因爲伊大權能 ê 行做，o-ló 伊；照伊美妙 ê 高大，o-ló 伊。3 Tiòh pùn 哨角 o-ló 伊；彈瑟彈琴 o-ló 伊。4 Phah 鼓跳舞 o-ló 伊；用絲絃 ê 樂器 kap pùn 簫 o-ló 伊。5 用聲大 ê 鐃鈸 o-ló 伊；用音高 ê 鐃鈸 o-ló 伊。6 凡若有喘氣 ê，lóng tiòh o-ló 耶和華。Lín tiòh o-ló 耶和華。

共同經課 - 3 啟示錄一章四節~八節

4 約翰寄 phoe hō亞西亞七個教會；願 lín 得 tiòh 恩典平安，tùi hit-ê 現在 tī-teh，早 tī-teh，將來亦 tī-teh ê，以及 tùi 伊座位前七個神；5 koh tùi 耶穌基督，就是忠信 ê 干證，死人中頭一個活 ê，地上 chiah-ê 王 ê 主宰。6 伊疼咱，用伊 ê 血 tháu 放咱脫離咱 ê 罪；hō咱做國，做伊 ê 父上帝 ê 祭司；願榮光權能歸 tī 伊，到代代。À-bēng。7 伊坐雲來，眾目矚 beh 看見伊；連鑿伊 ê 人亦 beh 看見伊；地上 ê 族，lóng beh 爲 tiòh 伊來啼哭。實在是 án-ni。À-bēng。8 主上帝講，我是 A-lī-hoat，koh 是 O-bí-ka，現在 tī-teh，早 tī-teh，將來 tī-teh ê，是全能 ê。

共同經課 - 4 約翰福音二十章十九節~三十一節

19 Hit 日就是七日 ê 頭一日，已經暗，學生因爲驚猶太人，就 tī in 所 toà ê 所在關門；耶穌到，khiā tī 中間，kā in 講，願 lín 平安。20 已經講 chit-ê 話，就用手 kap hiáp 下 hō in 看。學生看見主，就歡喜。21 耶穌 koh kā in 講，願 lín 平安；我差 lín，親像父有差我。22 已經講 chit-ê 話，就對 in pùn 氣講，Lín 受聖神；23 lín 赦甚麼人 ê 罪，就赦去；留甚麼人 ê 罪，就留 teh。24 有多馬稱做 Té-thó-má ê，是十二學生 ê 一個，耶穌到 ê 時，伊無 saⁿ-kap tī-teh。25 其餘 ê 學生就 kā 伊講，阮 chiah-ê 已經看見主 lah。但是多馬 kā in 講，我若無看見伊手中釘 ê 跡，無用我 ê 指頭 á 探伊釘 ê 跡，無用我 ê 手探伊 ê hiáp 下，我決斷 m̄信。26 過八日，伊 ê 學生 koh 再 tī 厝內，多馬亦 tī-teh。門已經關，耶穌到，khiā tī 中央，講，願 lín 平安。27 就 kā 多馬講，伸你 ê 指頭 á 來看我 ê 手；伸你 ê 手探我 ê hiáp 下；莫得做 m̄信 ê，tiòh 做信 ê。28 多馬應講，我 ê 主 ah，我 ê 上帝 ah。29 耶穌 kā 伊講，你因爲看見我 chiah 信；hiah-ê 無看見來信 ê 人，有福氣。30 耶穌 tī 學生 ê 面前，koh 有行 choē-choē 神蹟，無記 tī chit 本冊 ê；31 獨獨記 chiah-ê，hō lín 信耶穌是基督，是上帝 ê Kiaⁿ；信，就 tī 伊 ê 名得 tiòh 活。